

# Te We Bidi Dabego Jerusalem Hagede Gela Wali

## Hasia Nedebo Po

Bidi me deligo e buku te Babilon dabego te taun Jerusalem dolali sogo aseai dao. Tama te we bidi augwaligo augwa wiegi yai taun hobede genuai mu yai dao. Hasia te taun Jerusalem me Godigo tempel be tede elalui dao, aga da te God, aga te Israel hani dali aga dali bidiba wabo piksa tiwai elalui dao. Tama te Jerusalem dolali sogo da, te Israel dabego te Genuai Bidide homu daŋ wali dwasianu tula pai dao, tama augwaligo homu kolesaga dolali. Tama tibaso, augwali gela olama, hobede hauwa mu yali. Te e bukude deli deli daŋde te we bidigo hobedai gela balia Jerusalemde wali, te balia po dao. Te Juda hani augwaligo te genuai seŋe augwaliba pedelali, te sogo ma kone paliyu, augwaligo te balia po weyu ebo dao.

E buku tomode te gasa po me elalubao. Te Juda bagego koneani, te Jerusalem dolali se te page elalui. Te page e dao, augwaligo augwa God Genuai Bidi tudiba muyu, tama haniani tibo god dabeba lotu po weyu, dwai kolesaga hauwa mu eyu yai dao. Tama koneama, augwali mebago ge neyu, augwa homu begeleyu, da ma dobola sao po weyu bidai dao. Tama te Daŋ 3 te ves 21de gagalama, te ves 26ba sabolama, te ves dabede e tobage po elalubao, God da, te we bidi godolo mu ebo God da, tama “agai te kolesaga munu me siligobeo. Menio. Te agai te kolesaga tigidali bubugade gesi noma pedalubo tiwai ebo dao.”

## Jerusalem hanu te genuai seŋe elalubo wilawe we tiwai bidibao

**1** Jerusalem da, hobede mu dao,  
aga te yoya pai we me deli tiwai bidibao.  
Polobadu da, agai we bidi hauwa mu elalui dao.  
Tiali goli, tegoba, megi da, aga olo mu te elalubao.  
Awe, polobadu agai gasa to kantri dabe we bidi tomode  
genuai nogi elalui da.  
Tiali goli, megi da, aga seŋe genuai elalubao,

te wilawe we me tiwai dao.

Polobadu aga te polalubo kwin we tiwai bidama,  
agai provins hauwa tonaluai dao.

Tiali goli, megì da, te boi bidi dabego aga aiyaba  
elaluama,

tama aga olo sę ebo we tiwai te bidibao.

2 Polobadu da, tigidali kantri dabego aga abagi wai  
dao,

tiali goli megì da, te gasa kantri mego agade hobede  
me ebeo.

Te abagi dabego aga dali ili po olama,  
tama augwali agai boi bidi pedelali.

Tialima, tigidali sogo hulide Jerusalemgo gela dwai mu  
weyu idubo,

mu tama agai gela gųgai nabogedu aiyaba tulalubo  
dao.

3 Te boi bidi dabe augwaligo te Jerusalem pade bidali  
Juda dabe dali dwai sę elama, augwali dene manio.

Tama megì da, augwaligo te Juda dabe gasa kantriba  
kalabus elama, odasa palio.

Te kantri Juda te meba Israel hani isųwai kantri tomode  
elalubo dao,

tiali goli agai bugagia dulalubo meni dao.

Te boi bidi dabego aga pobeasa pelama,  
aga bagua sai elaluai dao.

Tiali goli, aga wi pabo usu meni yai dao.

Tama augwaligo aga pageabi yai dao.

4 Te taun Saionba pabo sunumi dabe olo elaluyu,  
hobedai gela oduali.

Magi baso meni, te augwalide te genuai lotu wabo  
genuai sogo dabede te bidi dabe me augwalidu te  
moni lotu be tempelba me soayu isųma ebaso.

Te taun tomoba pabo sunumi dabe olo elalua pali.

Tama te pris dabe augwali homu sęę mu elama,  
te bidigo dene sobaso gela wabo tiwai elama gela  
wabo.

Te Saion bulu gesi wegi mani sęę genuai mu tolobao,  
tama augwaligo te tempel bede balia po me wabo  
menio.

Tama me te taun Saion aga me te dwai dene mu siyu  
elalubao.

- 5 Te boi bidi dabego ugwa ela holobaso,  
 augwaligo Jerusalem tonalubo dao.  
 Tama augwaligo magi naide moni homu me ebo meni.  
 Magi baso meni.  
 Te Jerusalem dabego augwalibolo seḡe maiabo usu  
 isaḡbaso.  
 Jerusalemgo Genuai Bidi tudi ola mayu,  
 tama dwai seḡ hauwa mu yali.  
 Tama tibaso, Genuai Bidigo agai  
 te genuai dene tolomainu tagalali.  
 Tama te boi bidi dabego te Jerusalemgo wai boḡ dabe  
 te hwḡbode selama, kalabus elama, tigidali digibulu  
 buluba dabe kalabus elama, odasa pali.
- 6 Saiongo polobadu elaluali genuai nogi polo tulaluai  
 dao.  
 Tama agai tobolu bidi dabe te boi bidi dabede wi  
 painogo eyu,  
 augwaligo bomo sia sali,  
 te nai tusaḡwai bulu hasa dabego  
 augwali dili bomo kilabo tiwai yalio.
- 7 Megi da, te Jerusalem dolai elalubadi,  
 aga we bidi dabe digibulu sese mu tama usu nama,  
 wau bilibo dao.  
 Tama agai polobadu mu munolua asali wiegi wiegi yai  
 nai dabeba homu kone ma palobo dao.  
 Te boi bidi dabego Jerusalem we bidi sali sogo,  
 te meba gasa hanigo aga me tau sai menio.  
 Tama te boi bidi dabego aga dolobo suali,  
 tama augwali gisugu dwai mu wali.  
 Awe, aga tulalubaso, augwaligo keḡe po wali.
- 8 Jerusalemgo dwai dwai seḡ hauwa yai madi,  
 tama te dwai seḡ ebogo aga te dwai meda yai nai  
 pedelali.  
 Polobadu da, te gasa hanigo agabolo genuai nogi mawai  
 dao.  
 Tiali goli, megि da, augwaligo agai hale sulama,  
 tama augwaligo agabolo posobo po weyu,  
 gisugu mabo dao.  
 Tama te Jerusalem hale eyu,  
 aga gesabidi duala selama, genuai dene ebaso,  
 hwḡwa wabo tiwai yali.
- 9 Polobadu aga dwai kolesaga te pepeli dilide mu

elalui dao.

Tiali goli, agai aga dolabo homu kone me ebeo.

Tama tialigo aga mu dolama, mu dolali,

tama bidi mego aga hobede eyu,

tau sabo me egobeo.

Tama Jerusalem agai e tama tiwai po i obao,

“Genuai Bidi, eno e seḡḡ suo.

Te boi bidi dabego ena aiyaba mu elalualio.

Tama augwaligo ena dolalide wiegi yai homu pemene

elama,

gana pali dao,” wabo.

10 Polobadu te God Genuai Bidi te habu selebo po

weyu,

te Israel hani isaḡwai bage te moni lotu be tempel

tomoba pelamuo po wai dao.

Tiali goli, te Jerusalem we bidigo suali,

te tobage boi bidi dabe te bomo yai po boliyu,

augwali tomoba pelama,

tama tede elaluali wiegi wiegi yai nai dabe sese

tama wi salio.

11 Te Jerusalem we bidi augwali nasi genuai mu ebaso,

tama augwali nai gegebo bomai seḡ mu te ebao,

tama augwali hwaḡwa dwai mu obao.

Augwa tigi bomo ma sainu eyu,

augwaligo augwa wiegi wiegi yai nai dabego

te dobu si ebo seḡ eyu, te nai sela tubo dao.

Tama Jerusalemgo i weyu, te po obao,

“Genuai Bidi, sulama, koneao, ena dwai bidu,

te olo nai tiwai naga bidibao,” wabo.

12 Jerusalemgo aga paḡde elalubo sunumide soabo we

bidi dabeba i wabo seḡ ebao.

Agai te po obao. “Suiḡo,

ena genuai seḡḡ genuai mu elama,

tama Genuai Bidi agai ena dene genuai mu manio,

te aga seḡḡ moni posolo tiwai mu yali sogode.

Te polobadu te bidigo te tobage dene me sai meni yali

bogo,

tiali goli, dagego homugo te olo nai da weyu ebao.

13 Genuai Bidigo isi tagala palama,

tama eno dili isi ulama,

tama eno bomo tamunanio.

- Agai ena hagani wa gebelai digi, ena tola sali.  
 Tama agai ena şana palali digi, ena tudiba degali.  
 Tama agai ena mu tama tagalali digi,  
 tigidali sogo ena dene dwai mu doliyu ebao.
- 14 Genuai Bidigo digi eno yali dwai şe sese sisinama,  
 tama agai daş olama, keşnama,  
 tama agai eno magede keşnani.  
 Tama te dwai şe dabe şeş mu elama,  
 eno bomu sese mu silalio.  
 Tama Genuai Bidigo ena boi bidigo nogoba muani,  
 tama eno augwali dali hwjabo bomu menio.
- 15 Genuai Bidigo eno bomai ami bidi dabeba tudi ola  
 manio.  
 Agai ami i olama, ena dali hwjagasomainu elama,  
 tama eno gesi bidi dabe dolalio.  
 Genuai Bidigo kantri Juda we bidi dabe aiyaba agayalio,  
 te bidi dabego wain weş nigainu,  
 te wain du agabo masigi poude te wain agabo tiwai  
 yalio.
- 16 Te tialigo eno gela uga selama,  
 aiyaba dulumainu ilali.  
 Tama ena dali hobede elama,  
 tama ena ma dili ilabo bidi menio.  
 Te boi bidi dabego ena aiyaba polo elalui madi.  
 Tama tibaso, eno wai puluba augwali  
 dodolama mu bidibao,” Jerusalemgo te po obao.
- 17 Saiongo bidi mebago aga tau somainu homu eyu,  
 aga nogo balalubao, tiali goli, te bidi aselama,  
 aga dali hobede eyu, tau siyu me yagasobeo.  
 Genuai Bidigo boi bidi dabe tigidali bulu badu i olama,  
 tama te Israel hani dali hwjagasali.  
 Tama te boi bidi dabego te Jerusalem te dwai damua  
 pai pesage tiwai mu tonobo aş yali.
- 18 Tiali goli, Jerusalemgo te po wali,  
 “Genuai Bidigo ena dali te yali kolesaga te dolo mu dao.  
 Magi baso meni.  
 Eno agai po sela şawai dao.  
 Tega, dage tigidali kantri we bidi,  
 dagego eno te po odiaş.  
 Eno te genuai şeş tolali suo.  
 Te boi bidi dabe augwaligo eno gesi bidi

me gesi wegi dabe selama,  
tama augwali digibulu tɔ kantri dabeba mu kalabus igi  
palio.

- 19 Eno abagi dabego ena tau somainu i wai dao.  
Tiali goli, augwali eno boi bidi pedelalio.  
Eno pris dabe, me tobolu bidi dabe,  
augwali nasi genuai mu yali.  
Tama augwali bugagia bidabo tubo nai gegebo bomai  
sɛ mu yalio.  
Tiali goli, augwali nai meniama,  
tama augwali eno sunumi dabede isai dao.”

- 20 “Genuai Bidi, ena suao.  
Ena genuai sɛɛ mu selama,  
tama ena dolama mu bidibao.  
Tama eno homu dwai mu elalubao.  
Magi baso meni, eno hagoma genuai mu elama,  
tama nago po sese tama sela sɔwai dao.  
Te boi bidi dabe augwaligo eno we bidi dabe  
eno sunumi dabede ela wiala silalio.  
Tama me te bede bidaluali we bidi augwali nasi eyu,  
gasi me eyu, isai dao.
- 21 Te meba gasa we bidi hanigo eno ena te dene ebaso,  
gela wabo po odali.  
Tiali goli, ena dali hobede yabo bidi meni yai.  
Te eno boi bidi dabego nago enabolo te mani te genuai  
sɛɛ po odali.  
Tama augwaligo nago te yali sɛɛ augwali wiegi yai  
homu pemene genuai mu ebao.  
Polobadu nago enabolo dwai dene maiabo bodolu muai  
dao.  
Tama te bodolu polo pedelalio.  
Tiali goli, megi da, eno homugo nago eno boi bidi  
dabeba me deli tiwai kolesaga me yao.
- 22 Nago eno yali dwai sɛ kone palama,  
tama nago ena dene manio.  
Tama tialima, nago megi da, te boi bidi dabego dwai  
kolesaga koneama,  
tama nago ena dali yali te kolesaga tiwai elama,  
tama nago te boi bidi dabe dene mao. Magi baso  
meni.  
Ena gela dwai odubao, tama eno bomu tamunaluyu,

didibili elama, tulolueibao.”

**Genuai Bidigo Jerusalem dolama, dene mani**

**2**

<sup>1</sup>Hobede mu dao,

te wiegi yai taun Saion.

Genuai Bidigo aga dali sêbê genuai mu yali.

Tama agai sêbê da, te hulua sai haowago taun mesega  
sai tiwai dao.

Polobadu da, te Jerusalem te kantri Israel bagego  
gawe ebo wiegi yai taun elaluama, tama megî da,  
agai te Jerusalem aiyaba elaluama,  
aga olo pobele bage tiwai elalubao.

Mu tama Genuai Bidigo te taun Jerusalem dolobo sogo,  
agai aga tempel be te taunde elalubao olama,  
homu kone me ebeo.

Menio. Agai taun sese tama mu dolalio.

<sup>2</sup>Genuai Bidi agai te Israel dabe hobede me ebeo.

Menio.

Agai augwaligo be nani sese tama dolali.

Agai augwali dali sêbê elama,  
tama agai wiegi yai kantri Judago  
bomai taun dabe aluama, tagalalio.

Agai te kantri me, aga tobolu bidi dabe dali,  
sese tama dolalio,  
tama augwali hale dwai mu yalio.

<sup>3</sup>Genuai Bidi agai sêbê dwai mu elama,

tama agai Israel dabego bomu aluama, tagalali.

Tialima, te boi bidi dabe asali sogo,  
agai te Israel dabe tau me sabeo. Menio.

Agai Israel mu dolalio, te isigo tigidali nai dabe dela  
silibo tiwai yalio.

<sup>4</sup>Agai te wiegi yai taun Saion dali boi bidi elama,

tama agai aga we bidi enainu enesigi balibiba  
tulalubo tiwai yali.

Awe, aga bomogo aga digi te Jerusalemgo gawe yai  
we bidi sese tama ela silalio.

Agai sêbê te posolai isi tiwai elalu,  
agai te isi te taun Jerusalem muani, bidigo wê  
gelebo tiwai yali.

<sup>5</sup>Genuai Bidigo Israel dabe dali boi bidi homu elama,  
tama augwaligo kantri mu dolama, tagalalio.

Awe, agai bomai taun dabe doliyu,

me augwaligo te wiegi yai bomai  
be dabe aluama, tagaliyu yalio.

Te tigidali Juda bulu sese tamade agai te we bidi homu  
seḡe emainu mu ilama,  
tama augwali gela geninama mu uduali.

6 Genuai Bidigo aga tempel be mu dolama, mu tagalali,  
te bidigo te gi be dolama, huḡila tagalabo tiwai tama  
yalio.

Agai te Israel dabe augwali teba pelama,  
tama agaba augwaligo lotu po wagi pabo digi  
dolama, tagalalio.

Tama te tiali kolesagago te Genuai Bidigo te lotu po  
wabo genuai sogo, me Sabat, si tama silalio.

Tama te we bidi, augwali te Jerusalemde bidali we bidi,  
augwaligo agaba te lotu wabo sogo dabe ma lotu  
weyu ebeo.

Genuai Bidigo te king me, pris dabe dali,  
agai seḡe genuai mu yalio,  
tama agai augwali augwa seḡe sela saḡawanio.

7 Genuai Bidigo te aga tempel be,  
me tede elaluali ofa maiabo altaba tуди mu ola mani.

Agai te boi bidi dabego te Jerusalem taun siyu,  
me agai tempel be huḡiyu emainu sula tagalalio.

Tama me te boi bidi dabe augwali te Genuai Bidigo  
tempel be tomoba pelama,  
tama augwaligo te be tomode subigila hae me po  
dabe wali.

Polobadu dago tede wiegi yai homu eyu,  
Godiba lotu po wedu geai goli,  
megi da, augwaligo hae bomonama wedu geai.

Magi baso meni, augwaligo te be sai dao.

8 Genuai Bidigo te genuai wiegi yai taun Saiongo  
masigigo nigai boma pai obo aluama,  
tagalabo homu yalio.

Agai te obo bugagia mu usu sai, te obo dolai hagede.

Tama agai te se ebode gagamua sabeo.

Agai te tigidali badu te obo dabe dali,  
te bobobage taua be dabe dali,  
te sese tama mu dolama, tagalali,

tama sese tama mu dolama, mu elalubao.

9 Tama agai te obogo sunumi dabe huḡinama, saḡanama



- tagaliyu,  
 me te sunumi palibo ain dili mimia şanama,  
 tagaliyu yalio.
- Tama te dolali nai dabe augwali t̄de munalubadi,  
 te dwai olo masigi hogomu dabego augwali  
 mesegelama elalubao.
- Te boi bidi dabe augwaligo te king aga tobolu bidi dabe  
 dali selama,  
 tama augwali gasa kantriba kalabus elama, odasa  
 pali.
- Te pris dabe augwaligo te we bidibolo te Godigo bomai  
 po me ola mabo meni.
- Me te profet sibigo te nade subo nai tiwai ma susiayū,  
 tama augwaligo Genuai Bidigo po ma sabo menio.
- 10 Te Saion monu dabe, augwali olo dali t̄de dulaluyu,  
 tama augwali pedauwali pania selama, bidalubao.  
 Augwaligo augwa tobolude t̄ hogomu munama,  
 tama augwaligo hobede side gudubo ugwa gudama  
 bidibao.
- Tama te Jerusalemde gesi wegi mane augwali  
 homu seğē mu elama,  
 tama augwaligo tobolu t̄ba basi gulama, elalubao.
- 11 Eno te Jerusalemde pedelali nai dabe homu kone  
 palama,  
 tama ena gela waligo eno gedu dene mu ebao.  
 Eno te hobedai we bidi dolama elalubo sulama,  
 ena gasa homu dwai mu ebo dao.  
 Eno homu dene dwai mu yalio.  
 Magi baso meni, eno suali,  
 te nai tusiawai wai puluba dali,  
 wai b̄q̄ dabe dali suali.
- Augwaligo bomo kimi meniama,  
 tama didibili elama,  
 te Jerusalem sunumi dabede tuloluama,  
 munalua pabo sualio.
- 12 Te wai b̄q̄ dabe augwali nasi ebaso,  
 augwa idabolo nai me aḡi momainu gela weyu ebao.  
 Augwali te taun sunumi dabede subigila tuloluama,  
 munalua pabo suali,  
 te ami bidi dabe te boide sili w̄bi dolama,  
 munalua pabo tiwai elalualio.

Tama augwa ida dabego te wai bõq dabe nogo daide  
muna sabo si da,  
te wai bõq dabe augwaligo bidibo ula sia salio.

- 13 Jerusalem, eno nage hobede mu dwalio.  
O Jerusalem, te meba taun dabe nago te sali dene tiwai  
me sai menio.  
Tialima, eno mena po mu olama,  
nago homu daq walaibawe?  
Nage dolali, te ene genuai mu tomoba pali tiwai yalio,  
te tamu aq ge te aiyana mu dulali tiwai yalio.  
Tama nage dego wiegi yai ma pedelemainu egowe?  
Woo, bidi menio.
- 14 Te nago profet sibigo te nade subo nai tiwai suali  
po olama,  
tama augwaligo nage dali ili po naga walio.  
Tama augwaligo nage ili po ola mayu,  
augwaligo nago yali dwai se hanilai menio.  
Te nage tau selama, te dwai se tagalama,  
tama nage bugagia bidimainu tau me sabeo. Menio.  
Augwaligo Godigo po pusubode ili po walio.  
Tama augwaligo pogo nage kegasa bilama, mu tagalalio.
- 15 O Jerusalem, te Israel hani isaqwai we bidi augwali  
tedu ela soyu,  
augwaligo nage dolali elalubao sualio.  
Tama augwali noma siyu, nogo hogwayu,  
tobolu peyu, kenq po ola mayu, e tama po obao,  
“Te taun tama te bidi dabego te wiegi yai sawi yai taun  
dao,” wali, “te taun te da, agawe?  
Te taun tama te tigidali tq kantri we bidigo gawe yai  
taun da, agawe?”  
Augwaligo te tobage hale ilibo po wabo dao.
- 16 Te naga boi bidi dabego nagede kenq po weyu,  
posobo po wabo dao.  
Augwali gisugu dwai mu weyu, e tama tiwai po obao,  
“Dago bomogo mu dao, dago te taun mu dolama,  
tagalali dao.  
Te taun Jerusalem dolali dao, dago.  
Tega! Dago te si tonaluali, megida,  
te si polo megida pedelali dao,”  
boi bidi augwaligo te tobage po wabo.
- 17 Te Genuai Bidigo polobadu mu te yainogo yali

te sę polo megi yali dao.  
 Polobadu mu Genuai Bidigo te po wai dao,  
 te Israel dabego agai po sela sębaso da,  
 teda agai Jerusalem dolaibao po wai dao.  
 Tama tialima, megi nage hobede me ebeo,  
 Jerusalem, agai nage aiyaba polo elaluali dao.  
 Agai nago boi bidi dabe bomo mu ilama,  
 tama augwaligo nage aiyaba elalumainu ilali dao.  
 Tama augwaligo nage dolalide wiegi yai  
 homu pemene elama, gana pali dao.  
 18 Te nago we bidi augwaligo Genuai Bidigo  
 augwali tau somainogo hwę te waiyęo.

Hobedai, Jerusalem,  
 nage hulide me giligade gela genina mu elama,  
 tama nago gela uga te ęi sabo tulubo tiwai emainao.  
 Nage hodo me doligio. Nage gela wabo sę naga idu  
 geao.  
 19 Hulide nage hauwa sogo mu hodalu,  
 tama Genuai Bidiba gela hwę wao.  
 Nago agabolo gedu haluasa po bomonama weyu,  
 te nago sęęę agabolo pusuyu,  
 me nago homu sęęę po agabolo pusao.  
 Magi baso menio, naga wai bęę dabe  
 augwali nasi elama,  
 tama augwali bomo kimi isibaso,  
 augwali te naga sunumi dabe  
 sesegede te dedege pabo dao.  
 Tialima, nago nogo ugwaba selama,  
 tama Genuai Bidibolo augwali  
 hobede emainu hanalu wao.

20 Jerusalemgo e tama gedu haluasa po wali,  
 “Genuai Bidi, nago te naga hani digi muba  
 te yali te dene mabo sę suao.  
 Te we dabe sibi augwaligo augwa wai bęę dabe  
 godolo mu eyu, negeyu yai dao.  
 Tiali goli, megi da, augwaligo augwa  
 te wai bęę dabego tigi tubao.  
 Tama te boi bidi dabe augwali naga digi  
 tempel be tomoba pelama,  
 tama tede augwaligo naga pris dabe,

- me profet bidi dabe, ela silali dao.
- 21 Te boi bidi dabego augwa moni ge hwągo  
te gesi wegi ogwa me, monu dabe me, ela silalio.  
Awe, augwaligo te we sasiąwai gesi  
bidi dabe dali, te bidigo sasiąwai gesi  
we dabe dali te ela muani.  
Tama augwaligo tigi dabe eno sunumi  
dabede subigila wilalua pabo.  
Genuai Bidi, nago eno  
te we bidi dabe dali sębę mu yalio.  
Tama nago augwali dali hobede me ebeo. Menio.  
Nago augwali elama, isilai dao.
- 22 Nage sębę mu elama, tama nago te boi bidi dabe  
tigidali badu i olama, tama augwali aselama,  
ena dali dwai sę yali dao.  
Tama boi bidi dabe hauwa mu asai dao,  
te we bidi dabe te lotu wabo  
genuai sogo asobo tiwai yalio.  
Tialima, boi bidi dabego eno we bidi sese ela silali,  
tama eno we bidi me deli wi sana peyu,  
te augwaliba pedelali sę po pusabo bidi mu menio.  
Eno ena we bidi godolo mu yai dao,  
tama eno augwali bugagia mu tonaluai dao.  
Tiali goli, megi da,  
te boi bidi dabego augwali megi mu silalio.”  
Te Jerusalem hanugo te gedu haluasa po wali.

**Eno homu begelama, Genuai Bidigo eno sęęę dabe silibo tonalubao**

- 3** 1 Ena e po asębo bidi, eno te dene tolobo kolesaga  
konebo dao.  
Genuai Bidigo ena dali sębę yalio,  
tama ena dene manio.  
Tama eno genuai dene mu tolalio.
- 2 Agai ena mu hulua sai sunumidu mu pomainu ilalio.
- 3 Tama tigidali sogo agai ena deli naga dene madu  
gebo dao.
- 4 Te agai ena elai tiwai elama,  
tama eno dili dabe tigidali mu togwa pelama,  
tama eno tigi aboga sai.
- 5 Agai enabolo haniani sęęę mayu,  
dene mayu elama,

- tama te nai dabego ena bagua selama, kalabus  
ilalio.
- 6 Agai ena hulua sai madi bidimainu ilalio,  
te polobadu mu isai bidi dabe tiwai mu tama tiali.
- 7 Agai ena polo kalabus ilali,  
tama ena wi pabo usu egobeo.  
Te agai eno nogo saḡa te seḡe yai sen bonogo kḡai tiwai  
elama,  
tama ena bilabo usu menio.
- 8 Eno i olama, Genuai Bidibolo ena tau sao po olama,  
hanalubo dao.  
Tiali goli, agai eno gedu haluasa po  
waboba olo saganama, odoobo menio.
- 9 Te tigidali badu ena painu yali madi,  
agai polo palia sesa bilalio.  
Te genuai masigi sunumide paliai tiwai  
aḡ yalio, te ena pabo sunumide.
- 10 Genuai Bidigo ena dolainu tonalualu,  
te bulu hasa bea me laion sigo  
te hasa dabe soabo tonaluyu, dualalubo tiwai yalio.
- 11 Genuai Bidigo eno sunumi tagalomainu elama,  
tama agai ena dolalio,  
te laion de bea sigo hasa pobeasa peyu,  
te hasago tigi togola tagalobo tiwai yalio.  
Tama tialigo ena dolama mu bidibao.
- 12 Genuai Bidigo aga ene enesigiba  
tulama, tama ena enani.
- 13 Tama agai ena haligade genuai mu enani,  
agai te ene dabego.
- 14 Megi da, eno we bidi hani tigidali  
augwali gisugu dwai mu olama,  
tama ena keḡe mayu, balia po wabo dao.  
Awe, kigamu me, giligade me, pio me,  
tigidali sogo balia po wabo dao.
- 15 Agai ena seḡe hauwa mu mani,  
tama ena mu paḡana palio.  
Te agai ena dene dali seḡe dali si mayu,  
ena paḡanobo tiwai mu yalio,  
te ha ebo aḡ sigo paḡanobo tiwai yalio.
- 16 Agai ena dali dene mabo seḡe mu yalio.

- Te agai eno tobolu t̄ba aiya t̄bo tiwai elama,  
eno kele degela tagalobo tiwai yalio.
- 17 Eno homu nagame elama,  
wiegi yai homu elama me bidibeo.  
Tama eno bugagia bidibo kolesaga te gegeda palalio.
- 18 Tama tibaso, eno te Genuai Bidigo  
ena tau somainogo tonalubo s̄ ebo, te usugobeo.  
Tama ena t̄de bobobage sogo bidigobeo, te homu ebao.
- 19 Ena te subigila wau bilibo bidi tiwai bidiyu,  
tama eno ena genuai s̄ḡ dabe kone ebao.  
Tama tego enabolo dene mobao,  
te dwai ha ebo āi tuai dene tiwai ebao.
- 20 Tigidali sogo eno te s̄ dabeba kone ebo digi,  
eno homu s̄ḡ mu ebao.
- 21 Tiali goli, eno gasa nai me homu kone yali,  
tama tialigo te tibogo eno Genuai Bidigo  
ena tau somainu bomo elama, mu tonalubao.  
Te nai dabe da e dao.
- 22 Tigidali sogo Genuai Bidigo da  
homu dene eyu, tau sabo s̄ elama,  
tama agai daba homugo k̄ā peyu,  
da godolo mu ebo dao.  
Tama agai te kolesaga munu me siligobeo.
- 23 Menio. Te agai te kolesaga tigidali bubugade gesi  
noma pedalobo tiwai ebo dao.  
Genuai Bidi, nago te homugo k̄ā pabo kolesaga  
da dali tigidali sogo ebo dao.  
Nago te kolesaga te wiegi yai mu dao.
- 24 Eno homugo eno meba nai dabede  
moni homu igi homu ebao.  
Genuai Bidi deli tama ena usu dao.  
Tama tibaso, eno agai ena tau somainu  
bomo elama, tonalubao.
- 25 Genuai Bidigo te aga gegelama,  
tama agai augwali tau somainu tonalubo we bidi  
dali wiegi yai s̄ ebo dao.
- 26 Te we bidi augwali dua bidiyu,  
Genuai Bidigo augwali te boi bidi dabego nogode  
ma oda somainu tonalubo kolesaga eyu da,  
te wiegi yai dao.

- 27 Tama me ma, te bidi dabe augwali gesi bidide  
gagalama,  
te kolesaga ebo eyu da, te usu dao.
- 28 Te Genuai Bidigo te bidi me delibolo sege  
mabode da,  
teda te bidi agaduba bidigi pelama,  
penane pania sai elaluao.
- 29 Teda Godigo aga tau sabo homu yali bogo.  
Tama tiyu, agai aga digi aiyaba  
elaluama, tama tonaluo.
- 30 Te bidi dabego aga nabo gede  
nogo sawaligo elebaso da,  
tama aga dali dwai po waiyu ebaso da,  
teda agai augwaligo te tama  
se emainu sula tagalamainao.
- 31 Genuai Bidigo aga tigidali sogo  
tudi ola magobeo.
- 32 Agai te bidi dabebolo sege mabo dao,  
tiali goli nosali agai augwali hobede ebo dao.  
Magi baso meni, aga da, te we bidi godolo mu ebo God  
dao.
- 33 Tama agai augwali dene me sege mabode  
agai wiegi yai homu me ebo menio.
- 34-36 Tama tibaso, bidigo te da kalabuside bidibo Juda  
bage dali dwai se ebaso da,  
teda Genuai Bidigo te koneaibao.  
Ma, bidigo te Ugwadu Mu Bidibo God dali hagoma eyu,  
tama gasa bidi dali doloba pai kolesaga isabaso da,  
teda Godigo te se ebo bidi sugobe da, agawe?  
Ma, bidigo te po tu ebo kolesaga doloyu,  
gasa bidiba dene mobaso da,  
teda Genuai Bidigo tede hagela homu mu yaibao.
- 37 Te Genuai Bidigo usu da hasia wasiyu da,  
teda bidigo magi se pedalumainu ebo usugobeo.
- 38 Te Ugwadu Mu Bidibo Godigo naga te we bidi  
bugagia bidimainu ebo dao,  
ma augwali te genuai sege somainu ebo dao.
- 39 Tama tibaso, bidi me bididubadi,  
te Godigo agai yali dwai se wei ponoyu,  
dene mobaso da,

teda te bidigo Godibolo wado po olamuo.

- 40 Dago dena kolesaga, me dena bilibo  
kolesaga dagalama, bugagia suo.  
Tama dago dwai kolesaga tagalama,  
tama da Godiba ma aselainao.
- 41 Te dago te Ugwadu Mu Bidibo Genuai Bidiba gedu  
haluasa po wabo si,  
dago dena homu ugwadu daide naga elaluyu,  
gedu haluasa po wagimio.  
Tama dago e tiwai po wao,
- 42 “Dago nage dali hagoma elama,  
tama dago seḡe sai dao.  
Tama nago dago seḡe sela saḡiayu,  
tama da te nago gedude dwagi yai ma pedalubeo.
- 43 Nago da dali seḡe dwai mu elama,  
tama nago da dali hobede me yai menio. Menio.  
Nago da pobeasa pelama, tama nago da elama, isilai dao.
- 44 Nago da dali seḡe elama,  
tama nago naga olo palia sai dao.  
Te nago naga digi te genuai pogo halua selama,  
tama dago gedu haluasa po wabo  
nage pageba sabolabo  
usu emainogo tiwai me yai menio.
- 45 Nago da aiyaba elalui dao.  
Tama te meba Israel hani isaḡwai gasa hanigo da te olo  
dwai nai tonobo tiwai elama,  
meda mu yai dao.
- 46 Dago boi bidi dabe tigidaligo da  
posobo po hauwa wai dao.
- 47 Te boi bidi dabego da elama, te da wi elama,  
me da tulalumainu yabo nai dabe ilalio.  
Tama da sese tama dolama, tagalainu yali.”  
Dago te tobage gedu haluasa po wainao.
- 48 Eno te hobedai we bidi dolama elalubo sulama,  
tama ena hobede mu elama,  
tama ena gela waligo gela uḡa tḡba tulalubo dao.
- 49 Eno gela wabo togogobeo.  
Tama tiyu, gela uḡa sesemane sogo aiyaba dulaibao,  
te sula sisama soabo aḡi tiwai yaibao.
- 50 Ena gela odubadi, te Genuai Bidigo aba tonama,



- tama da homu kone eboha usu naibao.  
 51 Eno ena taun we dabe augwali  
 dwai mu bidibo suali.  
 Tialima, ena homu seḡe genuai mu ebao.
- 52 Te bidi mebago ena dali olo dali  
 boi bidi homu elama,  
 tama ena olo dali elama, isilainu yali.  
 Tama augwaligo ena bidigo ba pobeasa pabo tiwai yai.
- 53 Te augwaligo ena te genuai tḡ dedageba saḡama,  
 tama ena dedagede bidibadi masigi ugwadu saḡo  
 tiwai yali,  
 te ena ela muainu.
- 54 Tama me te genuai aḡigo ena mesegelama,  
 tama eno homugo ena poma peyu isigowe homu  
 yali.
- 55 Genuai Bidi, ena dolama mu bidiyu,  
 tama ena isai bidigo bulude bidibo  
 tiwai bidibo aḡo yali.  
 Tama nago ena tau somainu, eno nage i wali.
- 56 Eno e tama po olama, i wali,  
 “O Genuai Bidi, nago eno gela wabo  
 odao, nago olo pania sigio,” wali.  
 Tama nago eno te i wabo po odai dao.
- 57 Tama nage ena pageba aselama,  
 tama nago enabolo “Wi igio,” po wai dao.
- 58 Genuai Bidi, nago ena tau selama,  
 tama nago te eno boi bidi dabe aiyaba elalui dao.  
 Nago ena augwaligo nogode ma oda selama,  
 tama ena bugagia bidibao.
- 59 Genuai Bidi, nago te bidi dabego  
 ena dolobo seḡe ebo nago suai dao.  
 Tama tibaso, nago augwaliba po tḡ elama,  
 nago ena tau selama,  
 te bage augwali aiyaba elalubo seḡe yao.
- 60-61 Genuai Bidi, nago koneani,  
 augwaligo ena dali boi bidi homu genuai mu ebao.  
 Augwaligo ena dali haniani dwai kolesaga  
 geme yabo homu hauwa ebao,  
 tama me augwaligo ena dali dwai po te obao.
- 62 Tigidali bubugade augwali po minama, posolu weyu,  
 ena dolabo po gegeyu ebao.

- 63 Suao! Te augwaligo sę elama,  
tama augwali toma tubo sogo da,  
augwaligo ena posobo balia po wabo dao.
- 64 Genuai Bidi, nago augwaligo  
te dwai kolesaga koneama,  
tama augwa te dwai kolesaga dolo ma wei ponao.
- 65 Nago augwaligo homu kolesaga dolama,  
i ola mabo po olama,  
tama augwali sese tama dolao.
- 66 Nago augwali dali sębę elama,  
tama augwali sese pobeasa pelama,  
tama augwali sese tama mu silao,  
te augwali e tǝde deli me bidigobeo.

**Te Jerusalem dabe augwali te boi bidi dabego augwali  
dali boi hwįani sogo dwai sogo mu suali**

- 4** 1-2 Hobede mu dao.  
Te Saion we bidi dolama elalubao.  
Polobadu augwali te sawi yai gol tiwai  
sawi yai mu elaluai dao.  
Tiali goli, te gol dabe augwali ula me isama,  
megi da dolama mu elalubao.  
Polobadu da, te Genuai Bidigo genuai be tempel  
augwaligo te wiegi yai masigi dabego nigilama  
elaluai dao.  
Tiali goli, augwali megi da hagayali dao,  
te masigi dabe subigila tulaluama,  
te tigidali taun sunumi dabede munalua pabo dao.  
Megi da, te we bidi augwali nogi ma elalubeo.  
Augwali te dwai pobebe bage sene dage te bidi dabego  
nigai,  
te sene dage tiwai dao.
- 3 Te uni yowi dabe augwali wiegi yai hasa dabe menio.  
Tiali goli, augwaligo augwa wai bǝų dabe koneama,  
tama augwaligo augwa wai bǝų dabe ame mabo dao.  
Tiali goli, eno we bidi hani augwaligo te uni yowigo  
ebo tiwai wiegi yai kolesaga ebo menio.  
Menio. Augwaligo te nai meni yai wa pai bulude bidibo  
genuai bago ebo kolesaga tiwai ebo dao.  
Te bago subigila ge sasagano bilama, tagalobo dao.  
Te tiwai me eno we bidi augwaligo augwa wai bǝų dabe

- hobede homu me ebo menio.  
 Menio. Augwaligo augwali tudi ola mabo dao.
- 4 Te dwasianu wai bɔq dabe augwali tuabo ame menio.  
 Tama augwaligo dogoni dolama, mu aloa pabo dao.  
 Te wai bɔq dabe augwali biliyu,  
 te we bidigo augwali nai momainu  
 biliyu, hanalua bilalio.  
 Tiali goli, te bidi mego augwali nai me mabeo.
- 5 Megi da, te moni bidi dabe me te nai sɔq palio.  
 Polobadu da, augwali nai wiegi wiegi yai nai dabe  
 hauwa elalui dao.  
 Tiali goli, megi augwali nasi elama,  
 augwali subigila te taun sunumi dabede isila peyu  
 yalio.  
 Polobadu augwaligo nai dabe hauwa mu elaluyu,  
 tama augwaligo wiegi wiegi yai au ebo nai dabe  
 gudiyu yai dao.  
 Tiali goli, augwali megi da,  
 nai mu menia pelama, tama megi da,  
 augwali te dwai pobebe bage sabo pesagede nai te  
 gegebao.
- 6 Te Jerusalem dabe, eno we bidi,  
 augwaligo dwai sɛ yalide sali  
 sɛgego te Sodom we bidigo sɛgeɛ edelalio.  
 Tama tibaso, Genuai Bidigo Jerusalem dabebolo  
 dene genuai mu te mani dao.  
 Tiali goli, Genuai Bidigo te Sodom dabe dolali sogo da,  
 te taun agai deli sogo mu tama te taun dolai dao.  
 Tama te boi bidi dabego megi te Jerusalem dabe dali  
 ebo tiwai te Sodom dabe dali yai menio.<sup>a</sup>
- 7 Polobadu te Jerusalem dabego tobolu bidi dabe  
 augwali bugagia bidiyu,  
 augwaligo tigi wiegi yai mu elalui dao.  
 Augwali bomai bidi dabe mu dao,  
 tama augwaligo tigiwali te wiegi yai homugo ɗɔɗ  
 wabo masigi tiwai ula elalubo ɔq yai dao.
- 8 Tiali goli megi da, augwaligo tigi dolama,  
 tama meda mu yalio.  
 Tama augwali te sunumi dabede bilibo sogo da,

---

<sup>a</sup> 4:6 Gag 19:24

- te bidi dabego augwali tonobo konebeo.  
 Augwali dili pulu ha elama,  
 tama augwaligo tigi wa pai mu elaluali.
- 9 Te boi hwibode isali bidi dabe augwali godolagi mu elama,  
 te nai habuge yai bidi dabe aiyaba elalualio.  
 Magi baso meni, augwali polo isalio.  
 Tiali goli, gasa bidi hani augwali nasi mu elama,  
 tama sege bobobage sogo tolama,  
 tama augwali dili pulu ha elama, tama augwali isalio.
- 10 Te augwa wai godolo homu yai ida dabe augwaligo  
 augwa wai boq dabe isibo sogo da,  
 te ida dabego te wai boq dabego  
 tigi selama, augwaligo ulama tualio.  
 Te tobage kolesaga te eno hobedai we bidi augwaliba  
 te boi bidigo te boi hwiani sogo te se pedelai dao.<sup>b</sup>
- 11 Genuai Bidigo te Saion dali haliga sebe dwai mu yalio.  
 Tama tibaso, agai aga dene genuai mu manio,  
 bidigo ai te toba gelebo tiwai yali.  
 Te agai te Saion isi tulama,  
 tama te taun sese dela silibo tiwai yalio.
- 12 Te gasa to pedai kantrigo king dabe,  
 me te haniani tode we bidigo homugo  
 te boi bidi dabego te Jerusalem aiyaba elaluama,  
 tama te taun sogobe homu yai dao.
- 13 Tiali goli, Godigo te boi bidi dabe tagala palama,  
 te Jerusalem dolai dao.  
 Magi baso meni.  
 Te profet dabe, me pris dabe, augwaligo dwai se elama,  
 tama augwaligo te Jerusalemde  
 dwai se meni yai we bidi ela mubaso tiai dao.
- 14 Te we bidigo kaneme te pris dabego ugwade,  
 me profet bidi dabego ugwade dagana sai tiwai elama,  
 tama Godigo gedude te pris dabe dali,  
 profet dabe dali, augwali meda yai tiwai dao.  
 Tama augwaligo genuai sege mu salio.

---

<sup>b</sup> 4:10 Bom 28:57; Ese 5:10

- Megi da, te pris dabe, me te profet dabe,  
 augwali te sunumi dabede popolo palio.  
 Tama tibaso, te we bidi augwali  
 te bage augwali pageba pabo hagela yalio.
- 15 Te we bidi dabego augwali  
 hai mayu elama, tiwai po wali,  
 “Dage gedao. Dage polo meda yali dao,  
 tama dage da p̄aba asigio.  
 Dage gedīo,” wali.  
 Tama tibaso, te pris dabe me profet dabe  
 augwali gasa kantriba wi peyu,  
 te olo wau bilibo bage tiwai bidali.  
 Tiali goli, te kantri we bidigo te bidi dabe augwali  
 te kantride bidimainu sula tagalobeo.
- 16 Genuai Bidi aga digi augwali  
 subigila pomainu sela sawani,  
 tama agai augwali homu kone me ebeo,  
 te pris dabe, me tobolu bidi dabe,  
 augwali te we bidigo gedude genuai nogi me  
 elalubeo.
- 17 Dago tonaluama, tama dago te gasa t̄o kantri bidi  
 hani me deligo da ma oda sagasomainu tonaluali.  
 Dago te sunumi dabeba gedu tonono ela bilibadi,  
 tama dago gedu dene yali.  
 Tiali goli, dago olo dali tonalualio.  
 Augwali me asobeo. Augwaligo da tau sabo menio.
- 18 Te boi bidi dabego da dolainu no munalubaso,  
 tama da te sunumi dabede bilibo usu me ebeo.  
 Te da dolabo sogo te polo pedelalio.  
 Tama tibaso, da sese tama mu dola silalio.
- 19 Da wi pobadi, tama te boi bidi dabego da pobeasa  
 asalio.  
 Awe, augwali bomonama mu,  
 te ba kemodagego te hasa ela sainu bogo  
 pobeasa aiyaba tulalubo tiwai yalio.  
 Augwaligo da bulu du dabedu pobeasa bilama,  
 tama augwali te nai meni yai wa pai bulude  
 dualaluyu, da tonalualio.  
 Te da asobo suainu,  
 tama augwaligo da tola siyu, ela palio.
- 20 Tama augwaligo da bugagia bidimainu tonaluyu,

da tau sali bidi me augwaligo tola salio.  
 Te da te Genuai Bidigo sa muani te king dao.  
 Dago homugo da te king dologode bidiyu,  
 tama da bugagia bidiyu yaiba homu yali,  
 te meba gasa kantri dabe ebo gilama bidigowe  
 homu yalio.

- 21 Kantri Idom, megi nage Usgo t̄de bidibao.  
 Megi da, nage gisugu dwai olama,  
 tama nage Saion dolaibaso,  
 wiegi yai homu pemene megi yao.  
 Genuai Bidigo s̄b̄e te wain w̄e kapu deli tiwai dao.  
 Tama agai te Saiongo te kapude tumainu ilalio.  
 Tiali goli, agai nagebolo nosali me maiwaibao.  
 Tama nage dolama mu polaibao.  
 Tama nago naga tigide ugwa peda s̄n̄ama,  
 tama nage hale genuai mu yaibao.
- 22 Saion, nago s̄ēge saibaso, Genuai Bidigo nago s̄ēge  
 wei ponani dao.  
 Tialima, agai nago kalabus yali silaibao.  
 Te nago we bidi kalabus yali p̄sigina s̄awaibao.  
 Tiali goli, Idom, Genuai Bidigo nago  
 yali dwai s̄ede sali s̄ēge haninaibao,  
 tama agai nage me dene mawaibao,  
 te s̄ēge wei ponoyu.

**Te Jerusalem dabe augwaligo Genuai Bidigo  
 augwali tau somainu hanalu wali**

- 5** <sup>1</sup>Genuai Bidi, nago dabolo  
 te dwai nai pedelali kone elama,  
 tama nago da hobede yagameo.  
 Suao, da dolama mu bidiyu,  
 tama da meba we bidi hanigo gedude  
 da hale dwai mu te ebao.
- <sup>2</sup> Dago t̄e te gasa kantri bidi dabego nogode te elalubao.  
 Tama augwali dago be dabede bidibao.
- <sup>3</sup> Da olo mu bidibao,  
 te tiana wai b̄q̄ dabe tiwai bidibao.  
 Me, te we dabe te wilawe we tiwai bidibao.
- <sup>4</sup> Polobadu da, te isi dabe me te āi dabe  
 te dena nai dabe elalualio.  
 Tiali goli, megi da, dago te āi me isi sainogo da,

- teda dago abeliyu naga ebao.
- 5 Te boi bidi dabe augwaligo da selebo genuai mu ebao,  
bidigo aga sę yabo donki ma kamel selebo tiwai  
ebao.  
Tama da tigi hagela dwai mu ebao.  
Tiali goli, augwaligo da toma tumainu sula me tagalobeo.
- 6 Da nai mu sę palio.  
Tama tibaso, dago te Isip dabebolo me Asiria dabebolo  
da tau somainu hanalu walio.
- 7 Dago wų dabe augwaligo polobadu te dwai sę yai  
digi, augwali polo isila palio.  
Tama megı da, da augwaligo dagede da sęęę tolobao.
- 8 Te Babilon dabego olo sę bagego da tonalubao,  
tama da augwaligo nogode ma dobola sabo bidi  
menio.
- 9 Da dolabo bidi dabe, augwali dago kantride bida bida  
pobao.  
Tama da nai gegegi painu pabode da,  
augwaligo da ela muainu tonalubo dao.
- 10 Da nasi genuai mu ebao, tama da  
posolo dwai mu ebao.  
Tama dago tigi posolo te stov posolo ebo tiwai mu ebao.
- 11 Te Saion bulu dude digi,  
me te Juda dabego taun dabede,  
te boi bidi dabe augwaligo dago we dabe,  
me dago wegı mani dabe kegelama,  
tama augwaligo penani sę dabe yalio.
- 12 Augwaligo dago tobolu bidi dabe selama,  
tama augwali pobila walalio.  
Tama augwaligo dago monu dabe dali  
me augwaligo wiegi yai kolesaga me ebeo.
- 13 Augwaligo dago gesi bidi dabego  
wit gosegebo sę bomai sę emainu eyu,  
me te ogomane dabego genuai isi pobi genuai elama,  
tolomainu ilalio.
- 14 Megı da, te genuai bidi dabe augwali te taun genuai  
sunumi dabe pąde me dualalubeo.  
Tama te gesi bidi dabego te gita gagali ma ebeo.
- 15 Dago wiegi yai homu pemene yali sia salio.  
Dago te tęąbi wabo kolesaga hasegelama,  
megı dago hobedai gela naga obao.

16 Dago genuai nogi polo tulalualio,  
te dago gawe yali nai dabe dolai dao.  
Da hobede mu yao.  
Magi baso meni, dago yali dwai sęde sali sęęę dwai yalio.

17-18 Dago homu te Saion bulu du te dolali dao,  
homu yali.  
Tama te bulu uni yowigo bulu pedelali dao, homu yalio.  
Tama dago dwai homu mu elama,  
tama da gela wali madi dago gedu dene mu yalio.

19 Tiali goli, Genuai Bidi, nage sesemane sogo king  
bidada pidu bidibao.

20 Tialima, nago da magi baso tudi ola menama,  
tama da magi baso sesemane sogo gegeda pobawe?

21-22 Genuai Bidi, nago da tudi ola menama,  
tama nago da dali sębę genuai mu yalio.  
Tiali goli, da nage pageba ma asaio.  
Tama tialima, nago da ma odasa asao.  
Tama nago da polobadu bugagia bidali tiwai ma  
bidimainu ilao.